

Itilliarsummi ikerasaliortoqarnissaanik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortaq Stine Egede, Inuit Ataqatigiit)

Akissuteqaat

(Ineqarnermut Attaveqaqatigiinnermullu Naalakkersuisoq)

Aappassaanneerpeqarnera

Naalakkersuisut sinnerlugit Sanaartornermut Ataatsimiititaliaq, siunnersuummik suliaqarnerminut atatillugu sulillaarsimaneranut qutsavigerusuppara.

Sanaartornermut Ataatsimiititaliap oqaatigaa, ikerasaliornissami aningaasaqarneq nalorninartoqartoq, kiisalu aningaasanut inatsimmi tassunga aningaasaliussassanik immikkoortitsisoqarsimanngitsoq. Ataatsimiititaliap aamma oqaatigaa, suliaassani taamaattuni Namminersorlutik Oqartussat kommunitillu akornanni akisussaaffinnik agguaneq nalorninartoqartoq, taamatullu Ataatsimiititaliap oqaatigaa, Kommune Kujalleq paasissutissanik, najukkami ikerasaliortoqarnissaanut pisariaqartitsinermik saqqummiussiviusunik tunniussisinnaasimanngitsoq.

Ataatsimiititaliap isumaliutissiissummi siunnersuut manna 2019-imi Upernaakkut Ataatsimiinnermi imm. 32-mut taputartuuppa, tassanilu aalajangiiffigineqarpoq, aqquernianut atatillugu attaveqaqatigiinnermut tunngasut pillugit ataqatigiissaarinissamik ilisimasanillu katersuinissamik qulakkeerinissamut Naalakkersuisut peqquneqassasut. Tamanna tunngavigalugu Ataatsimiititaliap siunnersuutigaa, Naalakkersuisut tamatumunnga taarsiullugu nunap immikkoortuini nunamilu namminermi attaveqaqatigiinnernut pilersaarummik, immikkoortunut pilersaarutitalimmik suliaqassasut.

Tassunga atatillugu erseqqissaatigissavara, 2020-mut Aningaasanut Inatsimmi ikerasaliassanik pilersaarusiornissamut 1,5 mio. koruunit immikkoortinneqarsimammata. Aningaasalli taakku maanna COVID-19-imut atatillugu sunniutinut sakkukillisaatissanik suliniuteqarnermi aningaasaliissutissatut siunnersuutinut ilanngunneqarput. Kisiannili 2020-mi Kalaallit Nunaata kujataani umiarsualivinni aserfallatsaaliuinerit suliarineqarsimasut takuniarneqarnissaannut pilersaarutaasumut atatillugu, Itilliarsummi paasissutissanik, ikerasaliornermi qaartiterlugit nunamiit piiagassat naatsorsorneqarnissaannut atorneqarsinnaasunik katersuisoqarnissaa Naalakkersuisut qulakkiissavaat. Ilisimasat taakku immikkoortumut pilersaarutip suliarineqarnissanut ilaatinneqassapput.

Nunap immikkoortuini nunamilu namminermi attaveqaqatigiinnernut tunngasunik pilersaarummik, immikkoortunut pilersaarutitalimmik suliaqartoqarnissaanik Ataatsimiititaliap siunnersuutaa aallaavigalugu, Sanaartornermut Ataatsimiititaliap inassutigaa, Naalakkersuisut allannguutissatut siunnersuutaat siulleq, imatut piffissaliussamik ilaqartillugu akuerineqassasoq:

"Itilliarsummi ikerasaliornissaq pillugu aalajangiinissamut tunngavissanik naammattunik suliaqarnissamut Naalakkersuisut peqquneqarnissaat pillugu Inatsisartut aalajangiiffigisassaattut siunnersuut, tassani pingaartumik aningaasaqarnikkut periarfissaqarfiusut, pinngortitamut sunniutaasussanik misissueqqissaarneq aamma

imarsiornerup isumannaatsuunissaa nalilersorneqassallutik, aammalu taakku immikkoortunut pilersaarutitaqartumik attaveqaqatigiinnermut nunap immikkoortuani aamma nunami namminermit pilersaarummi ilanngunneqartussanngorlugit, tassani aamma ikerasaliornissamut kommuniq aamma Namminersorlutik Oqartussat akornanni akisussaaffiup agguagaanera allassimassalluni. Aalajangernissamut tunngavissaq 2020-mi Inatsisartut ukiakkut ataatsimiinneranni Inatsisartunut nassiunneqassaaq."

Sanaartornermut Ataatsimiititaliap allannguutissatut siunnersuutaa Naalackersuisunit taperserpeqarpoq. **Kisiannili aalajangiinissamut tunngavissiap 2022-mi Ukiakkut Ataatsimiinnermi nassiunneqarnissaa allannguutaavoq.** COVID-19-ip nunarsuarmi tuniluunera pissutigalugu suliasanik tulleriiaarinerit allanngortinneqartariaqalernerisa tamanna kinguneraa, pingaartumik suliasat ukiumi aningaasaliiffiusumi 2020-mi aningaasartuutinik pisariaqartitsiviusinnaasut eqqarsaatigalugit.

Taamaattumik allannguutissatut siunnersuummik, imatut oqaasertalimmik saqqummiussisoqarpoq:

"Itilliarsummi ikerasaliornissaq pillugu aalajangiinissamut tunngavissanik naammattunik suliaqarnissamut Naalackersuisut peqquneqarnissaat pillugu Inatsisartut aalajangiiffigisassaattut siunnersuut, tassani pingaartumik aningaasaqarnikkut periarfissaqarfiusut, pinngortitamut sunniutaasussanik misissueqqissaarneq aamma imarsiornerup isumannaatsuunissaa nalilersorneqassallutik, aammalu taakku immikkoortunut pilersaarutitaqartumik attaveqaqatigiinnermut nunap immikkoortuani aamma nunami namminermit pilersaarummi ilanngunneqartussanngorlugit, tassani aamma ikerasaliortoqassappat kommuniq aamma Namminersorlutik Oqartussat akornanni akisussaaffiup agguagaanera allassimassalluni. Aalajangernissamut tunngavissaq UKA2022-mi Inatsisartunut nassiunneqassaaq".

Taamatut oqaaseqarlunga siunnersuut Inatsisartuni kajumittumik suliasanngorlugu tunniuppara.